

## **JADIDCHILIK HARAKATI VA UNING TURKISTON IJTIMOIY-MA’NAVIY HAYOTIDA O’RNI VA AHAMIYATI**

**Ashirov Dilshod Samad o‘g‘li**

Termiz davlat pedagogika instituti

Ijtimoiy-gumanitar fanlarni o‘qitish metodikasi  
(ma’naviyat asoslari) yo‘nalishi magistranti

### ***ANNOTATSIYA***

*Mazkur maqolada jadidchilik harakati, uning vujudga kelishiga sabab bo‘lgan omillar, Turkiston o‘lkasida jadidchilik harakati paydo bo‘lgan davrdagi ijtimoiy ahvol, Turkiston ziyorilari tomonidan o‘lkani ilm-ma’rifatli qilish yo‘lida amalga oshirilgan ishlar xususida so‘z yuritiladi.*

*Kalit so‘zlar. jadidchilik harakati, usuli jadid, ilm-ma’rifat, jaholat, Ismoil Gaspiralibey, Tarjimon gazetasi, Mahmudxo‘ja Behbudi, Behbudiya, savtiya, Tarbiyayi atfol, Turkiston xalq universiteti*

### **Kirish qismi.**

XIX asr oxirlarida Turkiston o‘lkasi ijtimoiy-ma’naviy hayotida jadidchilik deb atalgan harakat vujudga keldiki, bu o‘lka xalqlarining keying taraqqiyotiga, ularning ma’naviy qiyofasi o‘zgarishiga o‘zining ijobiy ta’sirini o‘tkazmasdan qolmadı. Bu harakat namoyondaları o‘zlarining sa’y-harakatlari bilan xalqning ilm-ma’rifatli, ziyorli bo‘lishida beqiyos hissa qo‘shdilar.

Turkiston o‘lkasida jadidchilik harakati vujudga kelgan davrda o‘lkadagi ijtimoiy-iqtisodiy ahvol achinarli holatda edi. Bosqinchi Chor Rossiyasi tomonidan istilo qilinib, mustamlakaga aylantirilgan Turkiston o‘lkasi xalqlari har tomonlama mustamlakachilik jabr-zulmidan aziyat chekmoqda edi. Chor hukumati o‘lkani o‘zining arzon ishchi kuchi va xomashyo bazasiga aylantirib olgan edi.

Mustamlakachilar o‘zlarida ishlab chiqarilgan zavod-fabrika mahsulotlarini o‘lkaga olib kelib sotish orqali bundan katta daromad topmoqda edilar.

Bu davrda Turkiston o‘lkasida mustamlakachilar o‘zlarining tartib-qoidalarini joriy etib, mana shu tartib-qoidalar asosida o‘lkani boshqarar edilar. Bu tartib qoidalarni esa o‘z navbatida mustamlakachilar o‘z manfaatlariga moslab ishlab chiqqan edilar.

Bundan esa mahalliy aholi aziyat chekmoqda edi. Bosib olingan Xiva xonligi va Buxora amirligi Chor Rossiyasining protektoratiga aylantirilgan bo‘lsa, Qo‘qon xonligi esa davlat sifatida tugatilib, uning o‘rnida Turkiston general-governatorligi tarkibiga kiruvchi Farg‘ona viloyati tashkil topadi. Garchi Buxoro va Xivada sulolalar hukmronligi saqlab qolning bo‘lsada, hukmdorlar ichki va tashqi siyosatda podsho hukumatining ruxsatisiz biror-bir jiddiy o‘zgarish amalga oshirolmas edilar. Bosqinchilar esa, o‘z manfaatidan kelib chiqib, o‘lka xalqlariga jabr-zulmni kundan-kunga kuchaytirib bormoqda edi.

O‘lkaning ma’naviy va madaniy qiyofasi ham havas qilarli darajada emas edi. Turkiston o‘lkasi xalqlari bu davrda bir necha asrdan beri davom etib kelgan o‘zaro urushlar, jabr-zulm va yana boshqa ko‘plab ijtimoiy-siyosiy omillar sabab qoloqlik botqog‘iga botib bormoqda edilar.

Qayd etib o‘tilayotgan davrda jahonning rivojlangan mamlakatlarida fabrika-zavod ishlab chiqarishi, sanoat taraqqiyoti jadal sur’atlar bilan davom etayotgan bir davrda Turkistonda qo‘l mehnatiga asoslangan dehqonchilik va hunarmandchilik xo‘jaligi hali hamon davom etib kelmoqda edi.

Turkiston o‘lkasida keng tarqalgan jadidchilik harakatining asoschisi qrim-tatar farzandi Ismoil Gaspiralibey (1851-1914) hisoblanadi. Ismoil Gaspiralibey dastlabki jadid maktabini 1884-yilda Qrimdag‘i Bog‘chasaroyda tashkil qilgan edi.

U o‘zining g‘oyaviy qarashlari, fikr va mulohazalari bilan xalqni ilm-ma’rifatli qilishga intildi. Ismoil Gaspiralibey yangicha o‘qitish uslubini ishlab chiqqan edi. Bu o‘qitish uslubini o‘zining 1888-yilda yozgan asarida keng miqyosda bayon qilib o‘tgani edi. Mazkur asar “Rahbari muallimin” ya’ni “Muallimlarga yo‘ldosh” deb nomlanib, u

mazkur asari orqali jadid maktablarining jihozlanishi,dars soatlari va ta'tillar kabilar haqida o'z fikrlarini bildirib o'tgan. Ismoil Gaspiralibey g'oyalari Turkistonga ham kirib keldi. 1893-yilda Turkistonga kelib, ilg'or ziyolilar bilan uchrashdi, Buxoro amiri huzurida bo'lib bitta jadid maktabi ochishga rozilik oldi.Ana o'sha yili Buxoroda birinchi jadid maktabi ochiladi va unga amir Abdulahadxonning otasi amir Muzaffarxon sharafiga "Muzaffariya" deb nom beriladi. Turkistonlik ziyolilar jadidchilikni yoqlab maorifni isloq qilish, «Usuli jadid» maktablarini tashkil etishga kirishdilar.1898-yilda Qo'qonda Salohiddin domla,1899-yilda Andijonda Shamsiddin domla va Toshkentda Mannon qori jadid maktabiga asos soldilar. 1903-yilda Turkistonda 102 ta boshlang'ich va 2 ta o'rta jadid maktablari faoliyat ko'rsatdi.

Turkiston jadidlariga Mahmudxo'ja Behbudiy, Abduqodir Shakuriy, Munavvarqori Abdurashidxonov, Abdulla Avloniy va boshqa o'nlab milliy ziyolilar rahnamolik qildilar. Ular dastlab maorifni isloq qilish yo'lidan bordilar. «Usuli jadid» maktablari tarmog'i kengayib bordi, ularda diniy ta'limot bilan birga tibbiyot, hikmat,kimyo, nujum, handasa kabi dunyoviy bilimlar o'rgatildi, savod chiqarish tezlashtirildi<sup>1</sup>.

U 1908-yilda Turkistonda bo'lib ilg'or ma'rifatparvarlardan Muftiy Mahmudxo'ja Behbudiy, A.Shakuriy va boshqalar bilan uchrashadi, o'zbek, tojik, tatar bolalari uchun yangi maktablar ochib jadidchilik g'oyalalarini keng tarqatadi. Bunday g'oyalarni tarqatishda Ismoil Gaspiralibeyning o'zi tashabbus ko'rsatib chiqargan «Tarjimon» gazetasining o'rni katta bo'ladi. U musulmon milliy ozodlik harakatining yo'lboshchisi sifatida tanilgan edi. «Dor ul-rokat musulmonlari» ilmiy-fantastik asari, «Yuz yildan so'ng 2000-sana» badiiy-publisistik roman, «Turkiston ulamosi» kabi kitoblar uning qalamiga mansub edi<sup>2</sup>.

Turkiston o'lkasida jadidchilik harakatining rahnamosi sifatida Mahmudxo'ja Behbudiyning mehnatlarini alohida e'tirof etish lozim.

<sup>1</sup> Q.Usmnov.M.Sodiqov.S.Burxonova. O'zbekiston tarixi. «IQTISOD-MOLIYA» T. 2006. 245-bet.

<sup>2</sup> R.Shamsutdinov.Sh.Karimov.O'.Ubaydullayev. Vatan tarixi. «SHARQ» T. 2010. 289-bet.

Mahmudxo'ja Behbudiy Ismoil Gaspiralibey tomonidan asos solingan jadid maktablari tarmog'ini o'lkada qaror toptirishda, bu maktablarning darslik va o'quv qo'llanmalari ta'minlash bo'yicha bir qator ishlarni amalga oshirdi.

Mahmudxo'ja Behbudiy yangi usul maktablari uchun geografiya va islom tarixi bo'yicha darsliklar yaratadi.

Xususan «Muntaxabi jug'rofiyayi umumiy» («Qisqa umumiy geografiya»), «Kitobat-ul atfol» («Bolalar maktubi»), «Muxtasari tarixi islom» («Islomning qisqacha tarixi») kabi bir qancha darslik va o'quv qo'llanmalari shular jumlasidandir. Mahmudxo'ja Behbudiy rahbarligida 1913-yildan boshlab «Samarqand» gazetasi va «Oyina» nomli ilk o'zbek tilidagi jurnal nashrdan chiqa boshlaydi.

Mahmudxo'ja Behbudiy o'z otasi sharafiga bag'ishlab «Behbudiya» deb nomlangan kutubxona ham tashkil qilgan edi.

Afsuski, Mahmudxo'ja Behbudiy o'zining ilg'or fikrlari uchun ta'qibga uchradi. 1919-yilda Buxoro amiri amaldorlari tomonidan qamoqqa olinadi. Unga nisbatan bolsheviklar ayg'oqchisi degan ayblov qo'yildi va qatl etiladi.

Turkistondagi taraqqiyat parvar ziyorolar erishgan yutuqlardan eng muhimlaridan biri bu mavjud tuzum mafkurasidan holi bo'lgan xalq ta'lif tizimi yaratilishi bo'ldi.

Jadidchilik harakati, shu vaqtgacha Islom dunyosida sira ham ko'rinnagan ilg'or va tezkor o'qitish-savtiya (tovush) usuliga asoslangan jadid maktablari tashkil topishidan boshlandi. Bu maktablarda bolalar bir yilda savod chiqarib, mukammal o'qish va yozishni o'zlashtiradi.

Jadid maktabida diniy va dunyoviy ta'lif-tarbiya hamda ilm o'zaro uyg'unlashtirildi. Bolalar qulay partalarda o'tirib, xarita va rasmlar yordamida tez savod chiqardi va diniy, dunyoviy ilmlarni o'rgandi. Jadid maktablari to'rt (boshlang'ich) va yetti yillik edi.

Masalan, Munavvarqori Abdurashidxonovning yetti yillik maktabini bitirgan yoshlar dunyoviy ilmlarni, rus tilini yaxshi o‘zlashtirgan holda jadid mактабида o‘qituvchi, masjidlarda imom bo‘lish, madrasa va hatto, xorijdagi dunyoviy oliy o‘quv yurtlarida o‘qish, savdo va boshqa korxonalarda kotib bo‘lib ishslash malakasiga ega bo‘lganlar. Bunday yetti yillik maktablar Toshkentdan tashqari, Qo‘qon, Samarqand kabi yirik shaharlarda ham ochiladi<sup>3</sup>.

Jadidlar o‘z faoliyatlari davomida oliy ta’limga e’tibor qaratadilar. Ular oliy ta’limning asosi bo‘lgan universitetlar ham tashkil qilishga harakat qiladilar. Munavvarqori Abdudurashidxonov, Abdurauf Fitrat, Mahmudxo‘ja Behbudiylar jadidchilik harakati vakillari milliy dunyoviy iliy ta’lim g‘oyasini asarlarid keng targ‘ib qilganlar. Jadidlar tashabbusi bilan 1918-yilda O‘zbekistonning ilk oliy ta’lim dargohi-Turkiston xalq universiteti (hozirgi O‘zbekiston milliy universiteti) ochiladi. Jadidlar yoshlarning chet davlatlarda ta’lim olishiga ham alohida e’tibor qaratdilar. Ularga bu ishda o‘lka taqdiriga befarq bo‘lmagan boy,sarmoyador kishilari yordam qo‘lini cho‘zdilar. Xususan, andijonlik Mirkomilboy Mirmo‘minboyev o‘z mablag‘lari bilan bu ishga o‘z hissasini qo‘shadi.

1910-yilda Buxoroda «Tarbiyayi atfol» jamiyat tashkil etiladi. Bu jamiyat ko‘magida ko‘plab yoshlar Turkiya va Germaniyaga o‘qishga yuboriladi.

Xulosa qilib shuni aytish mumkinki, jadidchilik harakatining ilg‘or namoyondalari, ular tomonidan mustamlaka sharoitida bo‘lishiga qaramasadan, o‘lka aholisini ilm-u ziyoli qilish yo‘lida olib borilgan keng ko‘lamli tashabbuslar hozirgi o‘sib kelayotgan har bir yosh avlod uchun matonat va jasorat namunasi bo‘lmog‘i lozim.

<sup>3</sup> B.Eshov. O‘zbekiston tarixi. 2-jild.Toshkent.2015-yil.

**FOYDALANILGAN ADABIYOTLAR RO'YXATI**

1.Q.Usmonov. M.Sodiqov. S.Burxonova. O'zbekiston tarixi. «IQTISOD-MOLIYA» nashriyoti. Toshkent. 2006-yil.

2.R.Shamsutdinov. Sh.Karimov. O'.Ubaydullayev. Vatan tarixi.«SHARQ» NMAK

Toshkent. 2010-yil.

3.B.Eshov va boshqalar. O'zbekiston tarixi.2-jild(XIX asr 2-yarmi – 1991-yil avgust) (Oliy o'quv yurtlari talabalari uchun darslik). Toshkent. 2015-yil.

4.R.Murtazayeva. O'zbekiston tarixi (Oliy o'quv yurtlarining nomutaxassislik fakultetlari talabalari uchun darslik).Toshkent. 2005-yil.